

दिनांक 02.10.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रदेश मांय सहकार सदस्यता अभियान री सरूआत-मुख्यमंत्री भजनलाल शर्मा कह्यो-इण रो मकसद सहकार से समृद्धि रा विजन ने साकार करणो है।
- देश आज राष्ट्रपिता महात्मा गांधी अर पैली रा प्रधानमंत्री लाल बहादुर शास्त्री री जयंती माथे वांने श्रद्धांजलि अर्पण कर रियो है।
- राष्ट्रीय स्वयंसेवक संघ प्रमुख मोहन भागवत आत्मनिर्भर भारत ने महताउ बताया अर 'स्वदेशी' अपनावण माथे जोर दियो।
- बुराई माथे अच्छाई री जीत रो प्रतीक दशहरो आज देशभर मांय हरख रे साथे मनायो जावे।

.....

प्रदेशभर मांय आज उं सहकार सदस्यता अभियान री सरूआत व्ही। मुख्यमंत्री भजनलाल शर्मा जयपुर रा कॉन्स्टीट्यूटशन क्लब उं ई अभियान रा शुभारंभ कार्यक्रम मांय बोलता कयो के सहकारिता उं समृद्धि फगत नारो नी है, सहकारिता काश्तकार री खुशहाली रो एक रस्तो है। वणां कयो के को-ऑपरेटिव री मार्फत राजस्थान रा गांव-गांव अर जन-जन मजबूत व्हे रिया है।

.....

15 अक्टूबर ताई चालण वाळा ई अभियान रो मकसद को-ऑपरेटिव सहकारी हलका ने मजबूत बणावणो अर सहकार से समृद्धि रा विजन ने साकार करणो है। ई अभियान रे तैत राज्य मांय 8 हजार 200 उं बत्ती पैक्स थर माथे शिविर लगाया जाएला, जिण मांय खास तौर उं पांच तरे री गतिविधियां व्हेला। ई मौके महिलावां अर नौजवानां ने सहकारी समितियां उं जोड़ण माथे खास ध्यान दियो जाएला। जिलां रा प्रभारी अहलकारां ने ई अभियान री मॉनिटरिंग करण रा निर्देश दीरिज्या है। बारां अर सवाईमाधोपुर जिला मांय सहकार सदस्यता अभियान रे तैत आज न्यारी-न्यारी शाखावां री समितियां मांय शिविर लगाई ज्या।

.....

देश आज राष्ट्रपिता महात्मा गांधी अर पैली रा प्रधानमंत्री लाल बहादुर शास्त्री री जयंती माथे वांने सिरधा रे साथ याद करे। नुवी दिल्ली मांय राजघाट माथे बापू री समाधि माथे सर्व धर्म प्रार्थना सभा रो आयोजन करीज्यो। राष्ट्रपति द्रौपदी मुर्मू, उपराष्ट्रपति सी.पी. राधाकृष्णन, प्रधानमंत्री नरेन्द्र मोदी अर लोकसभा अध्यक्ष ओम बिरला सवांरा महात्मा गांधी री समाधि माथे पुष्प अर्पण कर्या। वटे ई संसद रा केन्द्रीय कक्ष मांय प्रधानमंत्री श्री मोदी अर लोकसभा अध्यक्ष श्री बिरला महात्मा गांधी अर पैली रा प्रधानमंत्री लाल बहादुर शास्त्री रा चित्रां माथे फूल अर्पण कर्या। ई मौके केन्द्रीय मंत्री किरन रिजिजू अर पीयूष गोयल समेत केई मानेता लोग मौजूद रिया। ध्यानजोग है के गांधी जयंती रे मौके आज अंतर्राष्ट्रीय अहिंसा दिवस ई मनायो जावे।

प्रदेश मांय राज्यपाल हरिभाऊ बागडे अर मुख्यमंत्री भजनलाल शर्मा राष्ट्रपिता महात्मा गांधी अर पैली रा प्रधानमंत्री लाल बहादुर शास्त्री री जयंती माथे वांने नमन कर्यो। मुख्यमंत्री सचिवालय पूग र गांधी जी री मूरत माथे पुष्प अर्पण कर्या अर सर्व धर्म प्रार्थना सभा मांय हिस्सो लियो। ई मौके उपमुख्यमंत्री डॉ. प्रेमचन्द बैरवा ई मौजूद रिया।

न्यारा—न्यारा जिलां मांय ई महात्मा गांधी अर पैली प्रधानमंत्री लाल बहादुर शास्त्री ने श्रद्धाजंलि अर्पण करीजी। सिरौही मांय सर्वधर्म प्रार्थना सभा अर श्रद्धाजंलि कार्यक्रम व्हीया। हनुमानगढ रा कलेक्ट्रेट परिसर मांय गांधी पार्क मांय लोगां गांधी जी री मूरत माथे पुष्प अर्पण कर्या।

.....

केन्द्रीय गृह मंत्री अमित शाह महात्मा गांधी री जयंती रै मौके आज नुवी दिल्ली रा खादी ग्रामोद्योग भवन मांय जीएसटी बचत उत्सव रे तैत खादी अर ग्रामोद्योग उत्पादां माथे देशभर मांय छूट री सुरुआत करी। ई मौके श्री शाह देशवासियां उं खादी रा उपयोग ने बधावो देवण अर स्वदेशी उत्पाद अपनावण रा अभियान ने बधावण री अरज करी।

.....

राज्यपाल हरिभाऊ बागडे कयो है के स्वच्छता अभियान रे तैत खुला मांय शौच उं मुक्ति मोटी कामयाबी है। वणां कयो के राज्य रा सगळा जिलां मांय वे गया है। वांने ओ जाण र घणी खुशी व्ही के गांव—गांव अर ढाणी—ढाणी मांय शौचालय बण्योडा है। वणां शहर अर गांव मांय कचरा निस्तारण सारु सगळा ने मिलने असरदार बंदोबस्त कर्या जावण री अरज करी। श्री बागडे आज जयपुर मांय स्वच्छ भारत दिवस माथे व्हीया राज्य थर रा “स्वच्छोत्सव” जळसा मांय बोल रिया हा। ई मौके वणां स्वच्छ भारत अभियान रे तैत ठावा काम करण वाळा जिलां रा अहलकारां अर कर्मचारियां रो सनमान कर्यो। वणां स्वायत्त शासन री दो पोथियां रो लोकार्पण कर्यो अर सगळा ने स्वच्छता री शपथ दिराई। कार्यक्रम मांय नगरीय विकास मंत्री झाबर सिंह खर्रा अर नगरीय विकास महकमा रा आला अहलकार ई मौजूद रिया।

.....

राष्ट्रीय स्वयंसेवक संघ—आरएसएस आपरो शताब्दी वर्ष स्मरणोत्सव रा रूप में मना रियो है। आज रे ई दिन साल 1925 मांय विजयादशमी ने संघ री थापना व्ही ही। ई मौके नागपुर रा रेशमबाग मांय आरएसएस रो शताब्दी वर्ष जळसो अर विजयदशमी उत्सव रो आयोजन करीज्यो। कार्यक्रम मांय बोलता राष्ट्रीय स्वयंसेवक संघ रा सरसंघचालक डॉ. मोहन भागवत कयो के आत्मनिर्भर बणण अर दुनिया मांय एकता रा पगस मांय होवण रे कारण आपां ने ओ तय करणो व्हेला के निर्भरता आपां री मजबूरी नी है अर म्हे खुद री इच्छा मुजब काम करण मांय सक्षम हां। स्वदेशी अर स्वावलम्बन रो कोई विकल्प नी है।

.....

वटै ई प्रधानमंत्री नरेन्द्र मोदी आज आरएसएस रा देश ने समर्पित सेवा रा 100 साल पूरा होवण माथे उण री सरावना करी है। उपराष्ट्रपति सी.पी. राधाकृष्णन ई संघ रा शताब्दी साल रे मौके शुभकामनावां दी है। वणां कयो के राष्ट्रीय स्वयंसेवक संघ रा सदस्य लोगां री निस्वार्थ सेवा करण सारु सेवा परमो धर्म री भावना उं प्रेरित रेवे है।

प्रदेश मांय ई न्यारी—न्यारी ठोडां आरएसएस कानी उं विजयादशमी उत्सव मनाई ज्यो अर पथ संचलन निकाळी ज्यो। जयपुर मांय केई ठोडां उत्सव आयोजित व्हीया। दुर्गापुरा मांय व्हेया विजयदशमी उत्सव मांय बोलता आरएसएस रा प्रांत प्रचारक बाबूलाल संघ री सौ साल री जात्रा रो जिक्रो करता देश री अंदरूनी चुनौतियां उं सावचेत रेहवण री जरूरत माथे जोर दियो। भरतपुर मांय आरएसएस कानी उं शहर रा खास मार्गां उं पथ संचलन निकाळी ज्यो अर शस्त्र पूजन कार्यक्रम रो आयोजन करीज्यो।

.....

देशभर मांय आज विजयादशमी पर्व आस्था अर उमाव रे साथे मनायो जावे। न्यारी—न्यारी ठोडां दशहरा मेळा रा आयोजन ने देखता हिफाजत अर यातायात रा खास बंदोबस्त करी ज्यो है। राजधानी जयपुर

मांय ठोड-ठोड होवण वाळा रावण दहन ने देखता यातायात रा खास इंतजाम करी ज्या है। कोटा रा दशहरा मैदान मांय प्रदेश रा सब उं मोटा 215 फीट रा रावण रो दहन कर्यो जाएला। रावण दहन मांय लोकसभा अध्यक्ष ओम बिरला रे साथे ई मुख्यमंत्री भजनलाल शर्मा ई मौजूद रेवेला। सवाईमाधोपुर मांय आज सिंज्या दशहरा मेळा मांय कवि सम्मेलन रो आयोजन व्हे रियो है, जिण मांय देशभर रा नामी कवि भेळा व्हेला। न्यारी-न्यारी ठोडां व्ह्या दुर्गा पूजा महोत्सव रो आज समापन व्हेग्यो। सीकर मांय जुलूस रा रूप मांय दुर्गा मूरतां रो सरोवरां मांय विसर्जन करी ज्यो। और ब्यौरो म्हारां खबरनवीस उं

.....

रक्षामंत्री राजनाथ सिंह चेताया है के सरक्रीक हलका मांय पाकिस्तान रा किणी ई दुस्साहस रो इण तरे रो फैसलाजोग जवाब दियो जावेला, जिण उं इतिहास अर भूगोल दोन्यू बदल जावेला। श्री सिंह आज भुज मांय फौज रा बूँता रा अभ्यास मांय हिस्सो लिया। रक्षामंत्री विजयादशमी रे मौके व्हीया शस्त्र पूजन कार्यक्रम मांय ई भेळा व्हीया। श्री सिंह कयो के देश री सेना हर चुनौती रो मुकाबलो करण मांय कारगर है।

.....